

ENTZUTEGI NAZIONALEKO EPAILEAREN KARRERA JUDIZIALAK KOLPE GOGORRA JASAN DU

CGPJk kargutik baztertu du Liaño «salaketa larriena» duelako

Justizia administrazioaren organo gorenak ez zuen aintzat hartu Estatuko fiskal nagusiaren gomendioa, eta gehiengo osoz erabaki zuen Javier Gomez de Liaño epailetzatik baztertzea, leporatu zaizkion prebrikazio delituak argitu arte.

Erredakzioa / Donostia


BOTERE Judizialeko Kontseilu Nagusiak (CGPJ) atzo erabaki zuen Javier Gomez de Liaño Entzutegi Nazionaleko epailea kargutik behin-behineko kanporatzea, magistratua Sogecable auzian hiru prebrikazio delituenegatik —erabaki bat hartzea zuzena ez dela jakin arren— auzipetua izan ondoren.

Zigorren betetzea atzeratzeko eskatu zuen Liaño, auzipetueari jarri dion errekursoaz erabaki irmoa izan arte. Eskakizun bera egin zuen Javier Cardenal Estatuko fiskal nagusiak ere. CGPJk, ordea, epailearen zigorra berehala indarrean jartzea erabaki zuen. CGPJko 21 kideetatik 17k egin zuten neurri horren alde, haien artean Javier Delgado presidenteak. Lau abstentzio izan ziren: Margarita Retuerto, Enrique Arnaldo, Manuel Damian eta Emilio Olabarriarenak.

Benigno Varela CGPJko bozeramaileak jakinarazi zuenez, Liaño kargutik baztertu dute epaile batek bere eginbeharrean egin dezakeen delituri larrienaz akusatuta dagoelako, hots, erabaki okerrak nahita hartzeaz. Zuzenbide Estatu batean, gizar-teak Justiziarengan konfiantza izatea da oinarri nagusietako bat, esan zuen Varelak, eta kasu honetan hori arriskuan dagoela iritzi dio CGPJk.

Varelak gogorarazi zuenez, Botere Judizialeko Lege Organikoak esaten du bere lanetik baztertu behar direla epaile eta magistratuak haien betebeharrean egindako zerbaitengatik auzipetuz gero. Liañori leporatzen diote zigor neurri desegokiak hartzea Sogecable auzian inkulpatutako Jesus de Polancoren eta Prisako beste buru batzuen aurka. Gertakari horiek 1997ko udaberrian izan ziren, telebista digitalen eta haien sustengatzailen arteko gerra bizi-bizian zegoela.

Garzonen esku geratuko dira Liañoren ikerketak • Botere Judizialaren legeak esaten duenez, Liaño epailetzatik kanpora izango da epaile batean errugabetez duten arte edo auzia artxibatatu arte. Epailetan zigorra jasoko balu, kondenak iraun artean ezingo luke epaile gisa lan egin. Zigorra altxatzen zaion arte soldataren % 75 jasoko du Entzutegi Nazionaleko epaileak. Entzutegi Nazionalean Liañoren esku zeuden ikerketak organo horretako Baltasar Garzon epailearen eskutan geratu dira behin-behineko, Entzutegi



Gomez de Liaño epailea eta Marques del Prado fiskala, atzo, Entzutegi Nazionaletik ateratzean.

GUSTAVO CUEVAS / EFE

Nazionalak bere ordezkia izendatu arte. Garzon eta Gomez de Liaño adiskide ziren duela gutxi arte, baina bien arteko harremana asko okertu zen 1997. urtean. Liaño adiskide ohia leporatu dio bere aurkako salaketei bultzada eman izana.

«Ez dut inoiz prebrikatu», esan du Liaño agurrean • Liaño lan egin zuen atzo goizean Entzutegi Nazionalean, baina bertatik irten zen CGPJren erabakiaren berri jakituz. Epailearen langile eta Teresa Palacios epailearen agurra jaso ondoren, 15:00ak aldera ateratu zen Entzutegi Nazionaletik. Bertan egindako adierazpenetan, epaileak azpimarratu zuen berak ez duela sekula prebrikatu, «ez auzi honetan ez bestetan».

«Egun normala» zela eta penaturik ez zegoela esan ondoren, epaileak iragarri zuen auto ofizialari eta eskortari uko egiteko asmoa duela. Kezka bat azaldu zuen, hots, «azken inkestean arabera herritarren % 90ek ez dutela konfiantzarik Justiziarengan».

Liaño 1984an sartu zen Entzutegi Nazionalean, baina 1990ean utzi zuen CGPJn sartzeko. 1996an itzuli zen.

erreakzioak

◆ **Miguel Angel Rodriguez** ◆ Gobernuko bozeramaile

«Gobernuak ez zuen estrategiarik inolako komunikazio talderen aurka»

Josep Borrell PSOEko lehendakariak dioenez bestera, «Gobernuak ez du inoiz estrategiarik izan inolako komunikazio talderen aurka», Rodriguezen arabera. Komunikazio talde hori PSOEren inguruko Prisa da —Canal Plus, Ser, El Pais...—.

◆ **Maria Teresa Fernandez de la Vega** ◆ PSOE

«Oso larria da Cardenalek egin duena»

PSOEko ordezkariak ez zuen Gomez de Liañoren kanporatzea baloratu nahi izan, baina oso gogor kritikatu zituen epaile horren erabakiak sustengatu zuten Jesus Cardenal Estatuko fiskal nagusia eta Eduardo Fungairiño eta Ignacio Gordillo fiskalak. «Oso kezkatuta gaude Cardenalek, Fungairiñok eta Gordillok egin dutenarengatik; hirurek Gobernuaren instrukzio garbiak jarraitzen zituzten».

◆ **Antonio Romero** ◆ IU

«Espainiako Justiziak bi neurri ditu zigortzeko»

«Kaleko jendea oso harrituta dago afera honekin. Lasa eta Zabala auziaren eta GAlen gerra zikinen sumarioak kaltetuta geratu dira; ikusi dugu Espainiako Justiziak bi neurri dituela zigortzeko».

◆ **Ignacio Gordillo** ◆ Entzutegi Nazionaleko fiskala

«Erabakia txunditzeko modukoa da»

«Liañoren auzipetzeko erabakia txunditzeko modukoa da. Epaileak zuzen jokatu du auzi horretan, eta hala egin izan ez balu, esango genion. Oso aurrekari arriskutsua da epaile bat aldatzea edo aldatzen saiatzea gogokoa ez denean».

Apteko suprefetak legez kanpotzat jo ditu okzitanieraz diren gaztelu baten bisita txartelak

◆ **Buouseko auzapezak epaitegi administratiboan bere hizkuntzaz deklaratzeko asmoa azaldu du**

A Sokarros / Baiona

APT-EKO (Vaucluse) suprefetak ez du okzitaniera maite. Hori argi azaldu da, Buouseko (okzitanieraz Buous) auzapezari igorri dion mezu hotz eta motz batean, non bipilki agintzen dion herri horretako gaztelu zaharretako bisita txartelak frantsesez idatziak izan daitezen eta ez Proventzako okzitaneraz orain bezala.

Txarteletan hau dago idatzia: «Drech d'entrada per la visita dau fort. Comuna de Buous. Ocitania.» (Buouseko gazteluaren ikuskatzeko sarrera txartela. Buouseko udalerria. Okzitanieraz tutik ez dakian edozein frantses herritarrek ere oso erraz ulertzeko moduan den esaldi bat, beraz. Haatik, frantses amorratu bati ez zaio gustukoa izan, eta honek salaketa bat egin zion Apteko suprefetari. Ondorioz, «frantsesera da Errepublikako hizkuntza ofiziala» ohartarazi zion Buouseko auzapezari Raymond Cervelle Apteko suprefetak. Ohar hori egin eta, gainerat, okzitanieraz bakarrik idatziak diren sarrera txartel horiek ez gehiago erabiltzeko agindua eman ere.

Alabaina, Pierre Pessemesse auzapezak ez du amore emateko asmorik eta auzia epaitegi administratibora eraman gogo du. Auzitegi horren aitzinean okzitanieraz deklaratzeko asmotan dabilela adierazi du Buouseko auzapezak. Hala ere, xede honen gauzatzeko, nekeak izanen dituela pentsa daiteke. Bien bitartean, Pessemessek suprefetari idatzi dio eta eskutitz honetan ohartarazi dio, besteak beste, okzitanieraz zela Proventzako hizkuntza nagusia luzaz egon; okzitanieraz aritu zirela, mende mende, *troubadours* olerkari ibiltariak edo Frédéric Mistral idazle proventzarra, mundu zabalean ezagutua. Ez da seguru, haatik, Apteko suprefet jakobinoak arreta handia egin dion auzapezaren eskutitz honi, Lorrenan hartuko baitu suprefet kargu berria.

Gertaera honek harridura handia eragin du Buouseko udal agintari eta 118 herritarren artean. Are gehiago, jakinez geroz sarrera txartel hauek 1974. urteaz geroztik direla okzitaneraz idatziak eta horrek ez ziola inori atsekaberik sortu, urtean 30.000 bisitari izanik.